

Milli privels d'ascender il Diupathan


In cudesch per uffants gronds u giuvenils en rumantsch grischun

■ (anr/vi) Cuntanscha il lectur il spitg dal Diupathan u croda el en ina sfendaglia? La finiziun da «La muntogna dals 1000 privels» dependa da las decisius dal lectur. Il cudesch è cumpari en rumantsch grischun. Il Diupathan è ina muntogna da pli che 6000 meters autezza – in culm privlus che zuppa ses misteris. Mintga terz alpinist che ha empruvà d'ascender il culm è mort. «Els èn dads giu dal fil, crudads en sfessas da glatschers, schelads en la tempesta u simplamain sparids senza fastiz.» Uschia cumenza il cudesch da l'autur Fabian Lenk. La lectura è plain surpraisas. Ins na po betg simplamain leger il cudesch da l'emprima fin tar l'ultima pagina. Suenter mintga chapital ston ins sa decider: Tge via vul ins seguir? Quant vul ins ristgar? Duain ins suandar Leo, il guid da muntogna gagliard? U fissi pli prudent dad ir cun Tom, in guid da muntogna precaut? Tut tenor decisium arrivon ins sin il spitg dal Diupathan, u ch'ins finescha gia sin pagina 34 en il spital.

Ina mumia ed in santeri sut il glatscher

Il cudesch cuntogna pli che trenta finiziuns e probabel anc dapli variantas da leger. Il captivant: Ins è sco lectur sez la culpa sch'ins croda en ina sfendaglia. Ma igl è fallà sch'ins sa decida perquai adina per la via precauta. Era lezza maina forsa en in bus cun in chauffeur narr che zambregia in accident. U ch'ins frunta sin il glatscher tuttenina la mumia or dal temp da bronz e vegn tegnù si dals spierts da la famiglia da la mumia.

Plinavant: Era sch'ins na cuntanscha betg il spitg dal Diupathan porta l'expediziun forsa success. Pertge sut il glatscher sa zuppa in santeri daditg emblidà cun ritgs objects da fossa, pizs da lantschas, cuntels, anels e chadainas. Ils malets da quest chat sensaziunal van en turn il mund. Ma sa chapescha be sch'ins prenda la dretga decisium e turna immediat enavos cura che la glisch da la lampa da giaglioffa vegn pli debila.



Frontispizi dal cudesch La muntogna dals 1000 privels.

FOTO C. CADRUVI

In culm inventà

Il cudesch da Fabian Lenk sa drizza ad uffants gronds e giuvenils. Il Diupathan è ina muntogna inventada. L'autur na tradescha betg sche la muntogna sa chatta en l'America dal sid, en l'Asia u forsa tuttina en l'Europa. Il raquint cuntogna elements da tuts continents. In guid da muntogna fa endament ils sherpas en il Himalaia. La mumia sin il glatscher para d'esser parentada cun l'Ötzi da las Alps austriacas.

Entras la lectura spanegianta intervegnan ils giuvenils detagls davart l'alpinissem. Lenk descriva l'equipament dals alpinists che fan grondas expediziuns ed ils strapatschs che spetgan tar l'ascensium e descensium.

L'autur è reporter

Fabian Lenk è naschì il 1963 a Salzgit-

ter en Germania. El è stà diesch onns reporter tar differentas gasettas da boulevard e lavura da preschent sco redactor tar il «Weser Kurier». El ha scrit romans criminals per creschids en ils quals in reporter fa l'investigatur. Lenk è plinavant in grond fan da ballape, tge che sa mussa er en ses numerus cudeschs per giuvenils.

«La muntogna dals 1000 privels» è cumparida il 2004 tar la chasa editura Ravensburg. Uss ha la Lia Rumantscha edì la translaziun rumantscha. Daniel Telli ha procurà per la versium rumantscha. Ella è scritta en ina lingua equilibrada, tgunsch chapavla ed empernaivla da leger.

Fabian Lenk: «La muntogna dals 1000 privels». Edi da la Lia Rumantscha. 116 paginas. Illustraziuns dad Alexander Schütz. Pretschn: 12 francs. Cuira 2007.